

四庫全書

集部

欽定四庫全書

集部

西隱集卷一至三

詳校官鴻臚寺少卿臣 梁景陽

中書臣 劉源溥覆勘

總校官原任中允臣 王燕緒

校對官中書臣 李 荃

謄錄進士臣 唐 燦

欽定四庫全書

集部六

西隱集

別集類五明

提要

臣等謹案西隱集十卷明宋訥撰訥字仲敏

滑縣人元至正中舉進士任鹽山尹棄官歸

明初徵為國子助教陞文淵閣大學士遷國

子祭酒卒於官正德中追謚文恪事蹟具明

史本傳劉三吾撰訥墓誌稱所著西隱集十

七卷而明史藝文志黃虞稷千頃堂書目俱作十卷此本有東萊劉師魯跋稱其集初為上海張趨所手錄滑人王崇之令上海從其後求得而刻之歲久漫漶師魯因鳩工重刻蓋即十卷之本豈張趨繕錄時又有所刪併故與墓誌不合歟集前四卷為賦詩後六卷為雜文附以明太祖手勅四道及白雲茅屋賦二篇記一篇白雲茅屋者詢所築別墅之

名也訥領成均胄子之任師道嚴正為一時
典型文章亦渾厚典雅其奉勅製大學碑極
為明祖所賞今具載集中又有壬子歲考試
秋闈和北平行省照磨葉叔則詩及秋闈即
事諸詩壬子乃洪武六年蓋訥嘗為北平考
官而本傳墓誌均之未載其過元故宮詩十
九首纏綿悱惻有黍離麥秀之思讀其詞尤
足悲其志矣乾隆四十四年六月恭校上

總纂官

臣

紀昀

臣

陸錫熊

臣

孫士毅

毅

總校官

臣

陸費

墀

墀

欽定四庫全書

西隱集卷一

古賦

勉齋賦

有序

知陽城縣李侯文輝之齋以勉名求言於余余二十
年流離不知勉者也言將焉取抑不敢終無言也故
賦之願與侯以共勉云其詞曰

明 宋訥 撰

仙李蟠根遠毓清芬有美一齋勉勉德人踞高明而養性挾敞朗而頤神將自強以進學期為己以脩身於是典籍閱詩書親性命討道義論有圖有畫以琴以樽靡華靡陋不俗不塵慨人慾之易萌嘆至道之難聞念千歧之洶洶苦百慮之紛紛究聖愚之曷異由敬肆之是分行易忽而加戒言易誕而防嗔不惰其常朝夕匪懈不憚其艱夙夜惟寅方其處也有過斯改見賢則尊沈潛乎君臣之義漸漬乎父子之仁欽斯承斯無替乎顛

沛念茲在茲莫間乎晨昏迨夫出也嚴以守己莊以莅
民澹以整而著績儼若思以策勲造次克念而居之也
則安戰兢自持而行之也則純效古人之進脩企前哲
之經綸惟實病之是除惟實知而乃言惟實德而乃鄰
豈攘掇其土苴豈剽竊其膚皴起居亦學道無時而不
進游觀亦學德無日而不新動靡違而靡愆靜常勵而
常勤有操無忘之汲汲有持無怠之循循心內正而不
荒事外制而有倫每原始而求終敢以偽而亂真內外

之交正不偏作止之迭資莫混非誠也其免曷有非敬也其勉曷存若夫心廣體胖光風霽雲兩甌茶餘一鼎香焚顏四勿而銘心曾三省而書紳雍雍兮愉愉天天兮申申威儀凜兮可觀衣冠正兮不羣以杜乎忿慾之源以融乎天地之春故能探性命之奧而入聖賢之門也嗟夫勝己者宜友先覺者宜詢常登齋而請益預樽俎之留賓酬酢之間兢兢禮樂笑談之際孜孜典墳瞻風采之顯顯顧文質之彬彬被容接者登龍門而睥睨

觀星鳳者望少室而逡巡古戰場兮文欲降日五色兮
賦莫伸北海避詞源之萬斛義山讓筆力之千鈞煥乎
瑞時之麟皎乎貢國之珍賦勉齋以自訟聊舒意於斯
文

松雲軒賦為前進士王公勉作

有客餐松卧雲晦跡離羣抱歲寒之高節挹巖壑之
清芬過析城山而弭節訪松雲軒之主人布袖拂纓藜
杖叩門主人於是開軒下榻倒屣迎賓會青松以延坐

招白雲以侑樽清酬靜酌吞香飲醇驅俗却塵話素吐
真乃問於主人曰松雲名軒義可得聞豈取其秦皇之
封受以大夫者將自尊乎抑取其丁固之夢為十八公
者遺子孫乎又豈取其山中宰相陶弘景之自怡悅者
以為珍乎抑取其東籬處士陶靖節之無心出岫者以
為隣乎名一軒而取二物而賓主輕重之間豈亦有所
分哉主人乃起而言坐而欣幸先生之慨諾爰詳敷而
細陳夫松聳壑昂霄非羣木之彫悴而雲觸石潤礎乃

一氣之氤氲雲有時而舒卷惟松斯植雲有時而出入
惟松常存蓋有取夫四時在目青青不改有子可食有
花可採森風雪乎千丈貫冰霜於千載吾之有松勵節
貞心軒之得松增輝倍彩柱明堂而無慊於時用梁
大厦而有功於真宰斯材固不敢以自負斯志亦不
敢以自怠若夫盤龍蛇而不屈栖鸞鳳而不駭高仙桂
於明月壽靈椿於滄海雲漠漠兮有時來雲郁郁兮有
時在恍重樓而疊閣忽點綴而變黷悠悠橫數幅之綺

依依張五色之綵懷佳人兮不忘瞻親舍而靡懈以至資
雲之變化以為變化察雲之動靜以為動靜是吾之軒
又於雲而有待也客乃起坐呼童注酒于鍾舉我澗灑
之香沃子磊落之胸主之有軒軒之有松松之有雲聚
乎軒中當其霽雪晴煙春日秋風衣冠肅雍襟韻和融
高致自許清思無窮延騷人留仙翁來菲薄去肥醲浮
翠色於几席泛佳氣於簾櫳彼蒼其髯我飾其容彼變
其跡我正其躬收濟時之澤於掌握納後彫之操於丹

東斯時也或起而為棟或出而從龍人與軒有名而有
實松與雲有用而有功則主人名軒之義豈不日美而
日隆乎於是開顏一笑玉山西東松暝雲寒月側樽空

椰子酒瓢賦為知滑縣事諸君仲仁作

君前雷
州遂溪

縣丞

祝融之荒朱崖之疆有木惟椰花實同芳葉毳毳乎鳳
尾樹彷彿乎檳榔融瘴雨之滋養受海風之吹揚凝鯨
波之潤澤孕蜃氣之光芒竹長節兮下生雀五色兮上

翔採一殼之貞姿破半瓢之異常不涿而玄不老而蒼
訝琢疑雕離圓遯方謂為匏耶而非濟水之具謂為螺
也而無掩甲之銚制作合自然之度規模豈杞柳之戕
薄臨池之荷杯輕隨波之羽觴尊藤癭兮土宜危竹根
兮糝糠憎一杯之鸚鵡妬雙盞之鴛鴦斟酌乎真一之
醞輸寓乎波若之揚納麴生之風味友陸醕之壺觴
齊列並陳雖翠勺銀罍之屬無忝先後爭操競執雖嵇
康阮籍之徒亦效奔忙注春色於蒼顏添風韻於紅粧

疎水部之醒何親酒泉之渴羌素過乎陶匏之質貴饒
於金玉之相箕山之許由未棄陋巷之顏子不將若夫
公子高樓豪客畫堂銀屏前列綉幙後張薦瓊酥之炙
鶯封杏酪之蒸羊綠醅漲竹葉之釀紫霞溢葡萄之漿
夜月秦若蘭春風杜韋娘或妙舞兮垂手或清歌兮遶
梁巧笑仙容轉宮腰之猗儺懷春翠袖露玉笋之纖長
澆彼磊塊之胷傾此瀲灩之香銀鑿落兮在側金叵羅
兮在傍瓢於斯時孰低孰昂負清標與雅致任酣顛而

醉狂又若幽人草亭高士山房詩禮之庭翰墨之場逍
遙兮蘭佩芎中優雅兮野服雲裝杜窵半開香膿曬乎蟻
綠郢筒初斷色淺泛乎鶯黃縷銀絲之鱸鱠斫金膏之
蠟匡新洞庭之綠橘嘉糟丘之紫薑冠者數人童子兩
行再獻不假於歌喉一傾直潤乎詩腸滴殘瀝於布袍
散餘馨於銀璫瓢於斯時價比琳琅視金壘而不恥顧
瓦盆而有光有美一人邦家俊良典六藝於文教肅三
語於憲綱蔚贊畫之才華近池上之鳳凰出貳遂溪來

宰靈昌昔訪茲瓢得於雷陽封以溪藤之紙韜以蜀錦
之囊逮琴堂之公暇時會友以徜徉精麴蘖以作醴潔
甘旨而起嘗味過杜康客邀宋庠幕賓之丰儀俊逸廣
文之環佩鏗鏘挂一幅之墨梅設四位之胡床熱水沉
兮霏微燒銀燭兮熒煌乃命愛子鑰啓筠箱出清賞於
勝集樂良夜之未央疏如瓊芝果剝粟穰肴佳山雉味
美河魴一酢一酬和敬交彰一奠一舉賓主相忘延席
上之歡伯拓樽前之醉鄉引青州之從事啖湯餅于何

郎宜賢侯之特達重此器如圭璋嗚呼海中之洲瓊山
效祥實產椰子大小莫量懿為瓢而為榼亦風土之木強
來中華兮萬里幾山海兮梯航物遠見珍愛之恐傷木靈
知毒驗之允臧杳窮陬之地理恨考索之未詳吾將假
之過黃公之壚持之喚西家之墻曠席地而幕天脫聲
鎖而名韁屬一瓢於海神追秘怪於渺茫酌一瓢於坡
仙弔謫居之聞望盡南海於一吸漱嶺島之風霜倒著
白接羅翻污雲錦裳揖羣彥兮歸來拂醉袖於縑綉承

主人之索賦聊染翰以成章願常加乎洗滌示清白以
保藏

桃溪圖賦為知濬縣事項侯如英作

侯台州仙
居縣人

仙居亘兮台山異境迴兮塵寰種桃花兮千樹瀦溪水
兮一灣玉霄孤峯而遠踞瓊臺雙闕而上蟠擁赤城之
飛霞洒滄海之奔湍拔呈露之巖壑峭羅列之峰巒深
水澄清而莫測怪石嶙峋而可觀通遠近兮緣山腰以
為徑限內外兮束峽口以為關豈武陵之別源秘此景

於人間宜畫者之作圖極巧思而不刊若夫自成一區實
絕市闌雲煙昏旦而異狀水石峻激而交搏地外窅而
中敞山左合而右環石老兮苔封蔓絡人行兮蘿挽藤
攀飛泉噴林外之珠璣叢竹森石上之琅玕佳木齊榮
多梗楠而松檜異草旁綴半蕙芷而芝蘭春去兮水流
紅雨風來兮松生翠瀾清致過廬山之高顛險非蜀道
之難羨溪上之人家咸棋布而星攢至若灼灼夭桃嫩
萼破寒粧春色兮孔多孕陽和兮不慳枝剪綃兮旖旎

樹裁錦兮爛斑花開而遊客簪實成而野人餐深紅一
簇同黃師塔前之愛淺紅千樹異玄都觀裏之看又若悠
悠山溪非剡非磻清可濯纓深可投竿草邊之色玉染
花底之聲絲彈囀塵斷而魚潛在藻幽谷款而鴻漸于
干曲折有趣逾灌水八愚之溪遠近異勢陋龍門八節
之灘其中則有柴門竹籬屋覆茅管煙竇雲窗臺倚畫
闌扶杖一翁白髮蒼顏族立羣氓顏如渥丹雅集五賓
清酌幽歡船橫渡而不動連漪人過橋而佇聽潺湲又

有妹麗仙姿霧鬢雲鬟羅襪塵輕綺袖弓彎翹翠搖搖
佩玉珊珊垂髻三童嬌戲癡頑雞鳴日午犬吠晝閒恍
出塵之風致儼近古之衣冠彼美鴻儒隱處考槃志希
顏孟學絕申韓踵鍾王之筆陣登李杜之詩壇繼先德
之潛輝樂桃溪而盤桓自牧黃牛畊青山以食息閒乘
畫舫盟白鷗而往還氣和神清心廣體胖酒美而壺傾
書積而床攤門外之落花而呼童輕掃窗前之新句而
洗硯重刪視浮雲之富貴同一夢於邯鄲爰築野以自

適保金玉乎五官大明御天召對金鑿誠攄抱負策上
治安承制牧濬屏棄儒酸誕承流與宣化歷義膽與忠
肝常尊賢而獎善時剔蠹而擿奸懿寶軸之珍藏過霧
縠而冰紈勞西齋以持圖徵予文於卷端披圖再閱一
倡三嘆水依稀乎孫位花彷彿乎邊鸞松石仰法乎張
藻山林遠師乎范寬蘊紫猶深積翠初乾嘉山水之奇
特玩姿態而莫殫非天造而地設抑鬼鑿而神剡予將
歷幽勝登巔屹沂溪流而艤舟望桃花而解鞍訪主人

之高躅殆管窺乎豹斑沾葛屨而松雲漠漠滴野服而
花露溥溥歌孫綽天台之賦高斟綠蟻弔承禎白雲之
號細煮龍團詢陳襄之正教未遠悟顧歡之栖隱非艱
拚一笑而傾倒愧文章於二班嗟夫物以畫傳者有之
矣物以文傳者有之矣抑又知文有時而在畫有時而
殘乎此東坡之記方日光而玉潔而寶繪之堂已毀凡
而畫漫慨予年之衰暮覺才譎而文孱雖不能作金聲
於擲地亦將續昌黎桃源之圖賦菜野桃溪之圖而濡

翰也

雲松巢賦

李子西先生以書室為巢取李謫仙五老峰詩篇名
雲松石泉樵侶滑臺宋訥為之賦曰

夫何天台倚空旁礪滄海兮降神生乎時髦藝圃將其
芳華兮聳士林之清標偉拔俗而出塵兮聳書室而名
巢藩白雲以為牆結青松以為茅締陋構拙失峻遺雕
幽扉掩蟠龍之枝虛簷拂栖鶴之梢石砌雜青靄而生

潤蓬窗齊翠色而相交兩燕莫敢爭百鳥不敢遭鄙千
年之靈龜笑一枝之鷓鴣興居有瞻眺之趣出入無攀
緣之勞棊枰可圍詩擔容挑筆鋒之雲葩自落硯池之
松花見撩豈隱夫江上之漁谷口之樵蓋寓夫林泉之
况湖海之豪仙客延左慈葛玄詩人接賈島孟郊標俗
子出諸大門之外曰無以我為驕也若夫日射月窺雨
灑雪飄一榻寬平萬籟寂寥守出岫之無心保歲寒之
後彫氣和神怡情閒慮消毀譽誰計名利盡拋石鼎香

清雲腴初煮銅爐煙細柏子重燒明休咎於禹疇玩消
長於羲爻融天理於一心忘老境於二毛又若鶯春雁
秋梅月花朝有來衣冠屏去煩囂浮雲之富貴不視貞
松之勁直自操盃簪多淑問之士傾蓋半忘年之交井
以投轄漆以投膠葩吐英含月弄風嘲躡知章之曠逸
追太白之風騷悟塵網之不墮覺人寰之可逃至於其
境熙熙其樂陶陶煙霞可留猿鶴可招遠覽乎九江之
泓澄平挹乎五老之岩堯天姥之煙綃亂綴赤城之霞

氣來饒接危亭交翠之秀麗連傑閣分綉之嬌嬈志濟
時而澤物材聳壑而昂霄燕寢也卧雲屏於高枕泚筆
也灑松煤於生綃顧處巢而審夫進退之道所以不類
於膠柱而繫匏也爰有遠遊之客儒冠仙佩博帶方袍
訪居巢之主人殆躡履以來邀時也日高而雲氣張幙
風輕而松聲奏韶客從容而問於主人曰昔有以樹為
巢而避唐堯者於一時寢處則得之矣然而不為夔龍
不為臯陶堯天廣大六合并包則夫箕山一拳潁水一

甯果足以遂巢父之逍遙矣乎矧先生丰儀挺挺如麟
在數聲譽靄靄如鶴鳴臯詩裁錦繡文捲波濤草書追
乎張顛小篆逼乎李潮天為時而生俊才國須賢以師
乃僚樂一巢於雲松不幾小太山而大秋毫哉主人曰
窮則獨善聖訓昭昭予也幼學壯行之心愛君澤民之
意不因巢而以爍以銷也居高乃琴書是藏養拙非巖
穴是韜始仕之年適逢聖朝徵賢之帛莩莩進善之旌
摇摇材不棄乎錙銖言有詢乎芻蕘職郡縣思潛心於

撫字居鼎鼎思效力於變調霖雨之雲不沈潤壑梁棟
之松豈沒蓬蒿於是贈客以天孫雲錦酌客以中山松
醪移雲外之芳樽開松下之中庖雅會清歡珍味嘉穀
魚羹縮項米飯長腰含香之紅櫻薦酪無腸之公子帶
糟美人唱金縷之詞仙樂彈雲林之瑛客起而歌以擬
童謠歌曰高山兮仰止幽人兮仙子栖英英兮畫軸浮
青青兮書几揮翰兮裁雲飲綠醕兮松為賓望雲松兮
高潔潛廊廟兮奇珍揖清風而興起兮動後來之搢紳

主人聞歌而喜酬酢斯頻再起作歌和以陽春歌曰憶
古先民兮穴處巢居巢名書室兮反思古初青松兮堅
剛白雲兮卷舒愛吾巢兮不孤前琴兮後壺左圖兮右
書愛吾巢之虛不吹兮齊竽不曳兮鄒裾將應時出
吾巢兮待詔於承明之廬也主客皆醉操觚飲瓢歌聲
已已笑語啾啾祝松以同壽筭呼雲以共遊遨主人謝
曰辱賜教以金玉音矣未克報以英瓊瑶也若吾子之
論其沾被於人者皆賸馥而殘膏恨星鳳之覩晚負清

話於中宵客曰予非韓愈君誠李翱龍門一登增輝我
曹既承顏而接詞宜返旆而回鑣於是山川暝色草木
涼颼客乃下白雲之堆出青松之坳指歸路迢迢思無
聊首重搖

鏡湖漁隱賦

通判大名府事紹興周侯巨淵自號鏡湖漁隱前進
士滑臺宋訥乃為賦之其詞曰

猗與勝景之權輿乎惟揚東區惟越南隅山水佳處鏡

然一湖偉馬臻於東漢信智巧之靡誣爰渴水之築塘
引山泉之來潄岸之以林麓域之以郊墟疏之以灘瀨
豁之以路途中流亘城積水涵虛非磻溪而嚴瀨非齊
汶而魯洙匪合流之涇渭匪會同之漆沮陋梅溪之水
泓澄而清淺嗤桃源之水洄洑而縈紆川流之所歸湊
雲霧之所涵濡視之無端撓之不洿曳澄練兮弗絕磨
瑩玉兮弗渝遠而望兮若明月一輪湛寒光於咫尺迫
而察兮若白雲千頃化秋水於須臾溶溶乎無鎔鍊之

踪跡浩浩乎非爐範之規模不假乎祝融氏之烈火不出
乎歐冶氏之洪爐有美君子爰處爰居卓然嘉邈不狂
不迂以道為師以隱為漁整頓乎舟楫蓬棹收拾乎網
罟筌笮衝波濤之浩渺蕩風煙之有無爰茲湖之四圍
恍天開之畫圖其東則峇堯東山遠際雲衢花草異品
松柏間株亂川霞而岫靄咸騰翠而凝朱紛山村與野
徑競涉渡而陟岵其西則會稽山秀越王臺孤峰巒屏
倚林壑翠鋪陂塘盛灌溉之利商賈盡闡闡之趨散煙

際之牛羊啼花間之鷓鴣其南則襟海帶江百艘千艫
浪槳風帆遠泛長驅聳秦望之傑山擁煙霞之可娛天
遠而樹色浮閩地險而江聲下吳其北則樓閣簾櫳臺
榭笙竽山處水行舟楫轉輸青山壯卧龍之勢黃堂來
太守之車萬家之簷楹丹青環合一郡之繁華錦綉重
敷其中則鴛鴦瀟瀟鷓鴣春鋤碧荇綠藻紅蓼黃蘆
遊人畫舫泛泛徐徐歌兒金縷唱舞妓翠雲梳柳姑廟
前賣魚為市道士莊畔納菱為租觀風景之變化若越

女吳娃爭妍而競姝也此鏡湖之在紹興猶西湖之在錢唐其遨遊登臨之勝蓋不少殊焉若夫和氣漸融化日初舒船尾載琴船頭載書茶竈兮蒙頂石花硯床兮白玉蟾蜍和滄浪之短歌賦孫綽之遂初寄興於白頭之波移家於黃茅之廬又若南薰生涼小雨如酥停橈沈網怡怡愉愉錦鱗勝乎河魴素鬢類乎江鱸船漾漾兮波心之葉人悠悠兮水中之鳧纜翠絲兮楊柳棹紅錦兮芙蓉又若理我絲竿整我冠裾短笛聲斷紅塵迹

踈見青虫之化蝶看白鳥之將雛江菽洗夕陽之藹野
飯炊秋風之菰載明月兮歸來共清樂兮妻孥至若六
合飛雪天地冰壺短蓑如蛭撐舟載俎斫鮮鱗以細烹
問香醪以再沽對野橋之梅花傾蓬窗之杯盃頽玉山
之就枕幻醉夢於蘧蘧隨寒暑之往來惟所好之從吾
朝出而暎暮歸而晡湖上之山久而相識湖中之鳥熟
而見呼放神於林泉之境絕迹於市井之間乃有山陰
高士寓跡樵夫遠訪漁隱雅意勤劬携童子以挑酒就

沙鷗為友于樵漁既會相顧咨諏幙以青松茵以綠蕪
屏以白蘋簾以青蒲採紅菱以剝玉煮紫芡以餐珠持
之以蟬螯剖之以橘奴酬酢既頻禮法弗逾話今昔之
興衰論事物之精粗樵者欣然而笑曰昔陸龜蒙高致
自放遊歷湖蘇交無流俗行無趙趙乘扁舟以往來載
釣具以與俱觀所為而所處莫非適意以自如也張志
和江湖散誕以哲若愚有高趣而酣酒嗜畫無忤色而
執畚浚渠辭翰林之待詔忘百慮與百須垂釣鈎以無

餌蓋亦志不在乎魚也一自號江湖散人一自號煙波釣
徒二子之事與子之志同歟否歟今子際皇明之治平
聞巖廊之都俞紫微者翥池頭之鳳蒼柏飛臺上之烏司
諫者簪獬豸之冠牧郡者佩銅虎之符煙霞痼疾者起
而獻策泉石膏肓者入而陳謨彼濟濟之多士悉萃聚
於清都漁隱曰人各有志不為藏而屈不為行而據侍
老母於萱堂戲綵衣於庭除聞君臣之義熟矣尚敢忘
四海之民潔七尺之軀哉樵者曰子又知夫昔之居此

郡者謝安有東山歌舞之樂王徽有剡溪回棹之譽昔
之居此湖者賀監為四明之狂客方干為一世之詩道
蓋將問其故者既皆湮沒而無餘矣又徒弔古人之既
逝論出處而躊躇况吾與子樵漁於山水之間侶魚鰕
而友麋鹿亦何有利縻而勢拘哉賓主釋然而笑舉酒
更酌醉起携扶樵者呼童而去乃歌曰隱漁先樂於湖
上兮山澤之癯舍漁後樂於天下兮經綸之儒釣渭陽
而非虎非羆兮佐蒼姬以唐虞遂去不復與言

石門隱居賦為滑縣分教陳邦達國子作

今為
緜縣

丞

一山倚空蒼然疊玉陋會稽之砒砒焉兩崖擘雲豁然
道路薄原憲之桑樞焉盍觀勝地平高而外迴名山遠
近而環趨懿泉通而林遠嘉山竒而物殊宜俟夫華齡
隱逸之士雅量博洽之儒也若夫揚州之域滄海之隅
邈亘天柱有山突如勢萃律而險巖氣蜿蜒而扶輿澗
壑深而有趣峰巒峻而不孤遠嵐渾乎海濤秀色凌乎

雲衢映蜃樓之差我接鳥道之縈紆石之怪者若虎鬪
龍驤忽神劍而鬼鑿石之秀者若星形劍鏗恍天劃而
仙列羣芳簇綺萬籟吹竽松貞柏古鶴舞猿呼明月往
來無關防之鎖鑰白雲出入非闔闢之吹噓此湧泉之
勝槩抑他山之所無凡品勝校竒於登覽者咸小武夷
而陋麻姑以謂茲山猶蛾眉之在嘉臨臯之在黃琅瑯
之在滁乎有美一人考槃隱居深隔凡囂清對吾廬室
懸高士之榻門停長者之車其人也雖韜光而晦迹實

懷瑾而握瑜喜李賀之詩囊憎陸澄之書厨匪圖形之
姜肱非絕迹之申屠遠欲棄終軍之繻長不曳鄒陽之
裾感寓賦詩文而有理留賓投轄智而不愚翩翩乎九
霄之鵬昂昂乎千里之駒其地也有田容畊有水容漁
非王績之東園非林逋之西湖勝不假乎盤谷之序名不
資乎輞川之圖泉石或可以膏肓其心煙霞或可以瘳
疾其軀方其春也青陽育物芳菲可娛聽林鶯之再啼
賞溪桃之幾株樂山之靜方駕仁者浴沂之樂高歌舞

零芳草徑深綠凝乎携琴之屨落花茵厚香浮乎提酒
之壺方其夏也朱明布澤實就花敷嘉穀酒兮筭羹鮮
鱸潔兮溪魚羽扇初揮林軒氣爽紗巾半脫石壁雲虛
避暑青松扶板輿以彩服迎風北牖卧藤床以青奴逮
夫秋也水落石出葉脫草枯卷帷兮商飈暗度授衣兮
殘暑先除新涼入而蓬窻燈火香橙熟而竹几盤盃醉
帽黃花寒香過東籬之菊詩壇紅葉秋色似金井之梧
迨夫冬也物終乃藏閉塞之餘乍晴而冰漸生硯中宵

而寒粟起膚浴梅花於溫水之瓶燒龍涎於博山之爐
紙帳圍風呵筆聯乎藻句石鐺掃雪活火煮乎雲腴非
求逸於節序之內蓋勵志於弱冠之初也洪武天開帝
握乾符四海永清萬邦作宰搜羅羣材來集清都顧石
門之高隱方玉佩而瓊琚無北山之移文有北闕之徵
書納山靈之呵衛絕山鬼之挪揄承恩入成均朝天都
讀書誦詩友責師模一代文風同槐市之英俊二年化
雨沐璧水之涵濡皇帝曰吁文教猶踈選胄子之材德

錫衣宴以和愉往誨郡縣毋違聖模立師道於古滑開
斯文之正途四教不渝六藝不拘藹藹乎化青衿於醇
雅琅琅乎導黃卷於卷舒有詔還京文旆載驅乾坤開
泰拔茅連茹器宗廟之簠簋材寶玉之璠璵文鏗金而
戛玉志惡紫之奪朱拜九重之日月偉一時之嚴徐于
以居藩閫而牧斯民於以登輔弼而佐有虞于以偕言
語侍從之臣待詔金馬于以對獻納論思之臣講道石
渠表梁棟之殊用膺廊廟之時須學施而道行才展而

志攄歸覲親顏諧和友于忠孝之名遠揚家國之行不
汙入石門而訪舊爰過澗而陟岵風雲文彩既改觀乎
泉石煥爛錦衣復榮耀乎鄉閭嗚呼山也非終南之捷
徑人也非滄海之遺珠自嘆餘年景迫桑榆丹心素體
霜鬢雪鬚固不能待君功成而身退再執翰而操觚寫
隱居之終始豈陳阿而貢諛尚磨石門之壁刻茲賦而
與竹素俱也

春朝賦

出渭城兮朝雨晴上河梁兮春水生何登臨而遠餞有
美人兮朝京列衣冠於祖道叙分隔於離亭指金陵之
遠路計漢驛之前程離觴酒香去棹帆輕臨岐索賦揮
毫寫情若夫玉筍峯堯羅湖泓澄山高水長鍾秀產英
道義養於閉戶詩禮學於過庭樂平遠之一堂集討論
之諸朋保名門之舊業襲先世之遺馨風骨聳寒松之
直文彩藹春花之榮抱鐘鼎已成之器蘊圭璧不磨之
精天生俊才時際皇明起拔聲猷贊畫銓衡偉功成而

業立嘉文振而詩鳴寵膺高選來佐大名開幙紅蓮清
惟寄趣看牘紫毫慎在祥刑仰聖朝之立制追唐虞以
是行考績之典守正持平朝覲之禮陳善書誠明黜陟
於天下藹四海之頌聲惟郡守之歲見偕幙賓以同征
船渡龍灣門開鳳城覩萬年之江山望五雲之蓬瀛時
也紫禁方開玉漏初停輝輝寶扇燦燦金燈裊御爐之
天香轉宮柳之春鶯列文武之衣冠映閭闔之旗旌拜
日月之光華瞻稷契之儀形聞天語之從容凜臣心之

屏營有詔賜還虎拜彤庭思除民瘼思為國積思列循
良思立廉能思薦賢於九重思養士於六經思治安以
康田里思忠鯁以報朝廷思舟楫以濟巨川思鹽梅以
作和羹此丈夫之勵志願太常以有銘

又春朝賦

天開大明聖主龍興文修武偃治定功成懿禮明而樂
備樂天清而地寧蒲輪召老成之賢軺車起文學之英
濟濟多新豐之馬周彬彬咸長沙之賈生講當世之先

務立一代之典刑乃詔天下守令朝京叅朝覲於周禮
明黜陟於虞廷惟河朔之重地立列藩於大名地方千
里版籍羣氓臨軒冊受付託非輕蓋欲體聖心以安民
遵國制而定程溥承宣之教化秉撫字之純誠老幼受
惠養之澤田里無愁嘆之聲居儉履潔尋功簡能榮以
五馬表以雙旌慶郡民之多福得闕里之雲仍材堪分
閭藝足典城示勞來以出治本愷悌以寬征訓人則以
禮以法濟事則以權以經承朝命而不辱膺牧任而不

矜逮夫春風扇和時雨告晴促裝南浦遽起離情方臨
歧而折柳遂把酒而聞鶯連漪漾載月之舟衣冠餞朝
天之行簡冊書可考之績曾懷抱勿欺之貞每思叨於
重寄又恐負於寵榮沐異渥而凜凜漑寸丹而熒熒指
長江於龍灣想紫禁於金陵若夫春滿九重漏盡六更
紅雲開兮閭闔金水環兮蓬瀛噦噦之鸞聲至止煌煌
之燭影斜橫袞衣燦日月之光旌旗動龍蛇之形班列
鴛鴦樂奏韶韻侍臣上龔黃之名姓憲臣奏郡縣之澄

清天子若曰咨爾羣牧弼朕靈承授爾職以郡符書爾
名以御屏尚慮任之未重擇之不精盍盡心而報國如
臨淵而履冰詔許還治賜酒滿觥惟羣牧之感謝祝聖
壽於闕庭望天威之咫尺奉綸言而震驚承恩既退肝
膽葵傾願求來效共報昇平偉黃堂之良牧看竹馬之
重迎

又春朝賦

七政齊兮璣衡八音通兮治平大一統兮寶曆朝萬方

兮玉京仰聖皇之奉天當六龍之時乘兵威所向如雷
如霆斯民躋兮壽域柴望告兮武成圓方傲乎太紫正
位據乎坤靈左蒼龍之天矯右白虎之狎獍蟠玄武於
坎隅炫朱雀於離明開九軌於鍾阜之麓社萬堆於石
頭之城恢皇綱闡帝紘聲教被禮樂興丕基肇拓湯池
不驚憲章稽古圖治勵精偉鴻化之惟神若風霆之流
形帝謂蒸民孰遂其生治郡選守佐郡選丞保我黎庶
勉爾忠貞惟潔已而愛物惟恤刑而薄徵流皇明之愷

悌播一代之芳馨帝謂攷績國制罔輕成周是式唐虞是
程遠近來朝禮莫分更惟屏貪而去邪惟彰善而旌能
明國家之典禮示朝廷之勸懲有美周侯表表儀形選
膺通守廉祇飲冰羌正身而律物靡徑行而直情爰錄
成績朝天始行山迢迢兮驛途柳青青兮郵亭渡龍灣
之澄江望仙闕於蓬瀛雞人報曉春雨霽情濟濟衣冠
鏘鏘蔥珩拊心而葵藿傾披腹而琅玕呈彩鳳飛而炬
轉金蓮蒼龍偃而竿裊霓旌祥氣溢乎璇題香煙浮乎

綉覺夔龍列乎堯階駕鷺班乎漢庭望天威於九重如
執圭而奉盈鴻臚傳命誕告公卿文章者擇掌絲綸武
畧者擇典甲兵骨鯁者選為耳目謀謨者選為股肱承
宣之材可賜還郡鼎彝之器留作調羹凡百有位各盡
乃誠惟羣臣之感謝騰萬歲之懽聲乃有論思玉堂之
士待詔金馬之英從而相語曰昔臯陶歌虞奚斯頌魯
同載於經我皇明之立制蓋將與三五而同稱是宜有
頌永傳汗青乃稽首獻頌曰神武開天六合丕寧皇矣

聖主帝事靈承精一惟心至道恢弘法令惟仁大業充
盈九有以泰品物咸亨顧彼幅員廣包四溟牧守是資
同保天氓何究賢否何辨濁清立則攷績來朝闕廷第
其事業錄其姓名孰明孰幽孰降孰陞荒穴鼠伏高岡
鳳鳴一代典謨百王準繩恭己南面庶績咸凝如月之
恒如日之昇聖子神孫垂統萬齡小臣獻頌悚懼不勝

松巖樵隱賦

崔君景文由國子生來主滑縣簿自號松巖樵隱

乃為賦曰

吾聞寧海之為郡也本牟子之國居渤海之南人傑時
髦地靈海涵羣山環合有松一巖信地僻而境幽適土
肥而泉甘怪石列兮磷磷絕壁倚兮巉巉穹崖險而難
躋古澗深而莫探俯蜃氣之樓條高而條下瞰蚌珠之
采忽吐而忽含望羣仙之縹緲詫百怪之洪纖蓬萊遠
而碧雲暮合扶桑高而紅日朝暹微茫邀路之海童恍
忽當蹊之馬銜驚罔象翻浪而頭角髣髴訝天吳跳波

而鬢鬣鬢髮認港口之漁船辯山腰之酒帘吊繫馬之
遺跡想呆愚之舊剗召石山搖紅而綴彩依稀鞭影海
牛島乖蠻而隔夷隱約風帆幽邃過吳山之麓峭拔出
蜀山之尖非扶輿英淑之氣所鍾鬼神造化之功所秘
又孰得安居以養恬哉婉彼美人於斯是潛束荆而靡
編茅而庵圍青山於一榻宿白雲於四簷以樵為隱和
樂且耽檐負煙而戴霞斧發硎而礮礮路十里兮不倦
薪兩束兮在檐葛屨踏霜餘之葉蓑衣濕雨後之嵐晝

負薪而讀書買臣之所志夜燃薪而讀書畢誠之所欣
有曲突徙薪之智足能防患有披裘委金之節寧肯趨
炎拾松子於秋風苔砌掃松花於夜雨石龕就偃蓋之
陰而卧綠苔攀橫虬之枝而倚長杉紫鱗纏幹而森森
蒼髯擁樹而毳毳守後凋之操如石之堅結歲寒之友
如膠之黏留高僧而坐磐石待幽人而玩空嵌林煙清
烏紗之帽海風颺青霞之襜琴韜壁上之囊書插架頭
之籤覽泉石於長嘯納風月於清談詞源倒巫山之峽

襟韻澄秋月之潭心謹行而再思口慎言而三緘清廟之
器若鼎若鼎大厦之材以楨以楠久潛心於庠序素遠跡
於閭閻若夫有鶯綿蠻有燕呢喃攜樵童之六七賞山
花之兩三除袂臨流效舞雩之歸詠隔村沽酒過輞川
之半酣迨夫祝融司令如焚如暎脫巾而長揮羽扇曳
履而輕披葛衫南畝徐行壠頭之禾暢茂北窗高卧枕
上之鄉黑甜又若涼飈奏商新月磨鎌遊巖之野趣自
適安仁之秋興重添登高得句拾丹楓之可寫訪舊尋

盟折黃花之欲簪又若青女飛霜瑤花散鹽探梅於
斷橋流水看竹於虛牖踈簾書舍煮茶炭爇地爐之
獸吟軒呵筆冰生硯滴之蟾四序之代謝未已一己之
情思不凡有客過而問曰樵果隱者乎克世家學青
出於藍錦繡之胸人所景慕星鳳之儀人所觀瞻非王
官峪三有宜休非絕交書七有不堪將韜光晦跡以搗
謙乎抑邈世遺榮以礪廉乎且於一時之務咸識天下
之事皆諳今也徜徉於一巖數松之下不猶雕鷲之厄

於韝騏驥之困於駮矣第恐名未遂於深藏才孰容乎
久淹獨不聞商高有傅巖之夢周文有渭水之占乎方
今皇明一統聖德廣覃唐虞是繼湯武是兼明與日月
合道與天地叅有安民之大惠有感神之至誠崇德尊
賢遠佞去讒蓋樵而離隱勿負乎物議之僉且夫玉在
山珠在淵至寶一出而必珍鏡在奩劍在函重器百試
而何慚斯時也無北山移文之嘲無終南捷徑之嫌國
以忠報民以仁漸朝廷得柱石之用郡縣受霖雨之霑

乃才猷之當施勲庸之宜立非稱譽之是望功利之妄
貪也樵起謝客一笑掀髯勸松醪於芳樽出松實於筠
籃論議不已酬酢不厭客復謝曰我河朔之散人子山
東之奇男名重何蕃行高李曇荒老話言冒瀆威嚴於
是雲牋一展霜毫醉拈賦松巖之樵隱文有愧於輕謙

西隱集卷一

欽定四庫全書

西隱集卷二

明 宋訥 撰

五言

龍溪亭陽城縣主簿婺源方彥清家近龍溪築
亭溪上徵詩為賦四十韻

溪近龍居里方侯舊築亭人兼元祐傑地並鑑湖靈佳
麗青山足文華彩鳳翎沈情鍾雨露驤首奮雷霆海日

紅饒岼松風細入櫺精英蕃草木圖畫壯郊坰曲徑資
尋訪深源釀醪醕登臨環曠逸暉采疊晶熒景迫芙蓉
浦香來杜若汀綠楊維舴舻紅蓼立蜻蜓春色隨人蝶
秋光隔幔螢潤浮湘簟竹瑞溢楚江萍目與澄灣遠心
依勝槩醒凭闌生氣象投迹遠臙腥寫粹羣芳發攄幽
萬籟停詠歌沂上樂檢察座西銘樽俎春留榻軒居晝
扣扃聞歌花窈窕鐔佩玉玲瓏寶軸床頭卷牙籤架上
經石新煎茗鼎銅古植著瓶梅影橫棊局蘭芬襲枕屏

熱香金縷裊滌硯墨花零水果收菱芡仙羹煮茯苓魚
遊留客釣鶯語抱琴聽竒觀窺洙泗高談別渭涇狎鷗
盟淨潔引鶴飲清冷嗜好林泉癖篇章月露形清廉堅
素節恬淡養修齡仇覽鸞栖棘庖丁刃發斲姓從方叔
遠家比莆田寧人吏瞻卿月郎官映列星冠裳榮白日
鵷鷺列青冥慷慨知風骨雍容見典刑鎮材通館閣顯
器動朝廷美玉終良價洪鐘豈寸筵剡船回戴宅磻釣
入周庭許國懷三策為霖憶四溟活因元子重愚自柳

侯馨香水空存迹桃源不是廳題詩無秀句辜負越山
青

分題得合浦還珠送澤州李彥和知州朝覲三
十韻

孟嘗臨合浦感應郡還珠至寶驪龍吐奇珍老蚌刻賣
綃歸水底解佩失江隅瑞徹廉州島光連覺社湖熒煌
星彩亂皎潔月華孤一境澆風變三年治化殊朱輪開
正路寶劍出洪爐得善如懷瑾持廉若握瑜憲臺宜阜

蓋清節瑩冰壺任重過唐牧官高合漢符詩書多士進
刑政庶民蘇未產休嘉穗桑刊種植圖懸魚朝却餽齋
馬夜空芻驛館雄三晉譙樓壯九衢祀壇知備禮泮水
見崇儒機杼燈前婦鋤犁壠上夫聖恩宣遠近民瘼絕
錙銖山圃春蔬賣花村社酒沽利人廉叔度潔已范萊
蕪雅趣南山號孤忠北極扶秋霜曾肅物時雨每霑枯
仙李青千葉甘棠綠幾株池頭今覩鳳臺上昔瞻烏馬
喜兒童竹鞭留長者蒲汗青循吏傳頭黑宰臣謨畫舫

龍灣度丹衷象魏趨紅雲開玉陛白日懸金鋪簡牘書
臣績江山拱帝都鈞衡者秉執廊廟聽都俞盛代時雍
洽臯夔佐有虞

題滑州節判鮑錫中踈懶釣魚圖十二韻

先生稱達者踈懶意如何遠識遺鍾鼎華齡厭綺羅芒
鞋紅霧外茅屋碧山阿磯穩重磐石衣輕細織蓑垂釣
忘歲月却餌傲風波絲上蜻蜓立竿前翡翠過夕陽青
草岬春水錦鱗窠幽夢隨鷗鷺深盟隱薜蘿恢諧留月

笑欵乃對雲歌高會左元放新詞張志和松園青偃蓋
山遶翠堆螺誰寫滄洲趣知君樂處多

酬鮑節判見贈陳叔起所畫青山白雲圖十二韻

浙東陳叔起揮灑異塵寰思入煙霞窟功移造化關芳
名唐棣並逸駕董元攀遠勢橫千里分流轉幾灣亭臺
青嶂外村落白雲間綠合高低樹嵐分遠近山石危芳
徑穩浪靜小橋閒草木藏盤谷峯巒聳黛髮境幽人迹
少林暗鳥聲慳隱約碁中趣從容物外顏郡侯遺粉繪

野老樂癡頑欲覓山中路相期日往還

霍元方見寄五言十二韻二首題鮑錫中踈懶
釣魚圖遂成五言二十韻二首以答鮑霍二君子

誰將踈懶寫三昧得天機遊息惟林壑冠裳只布韋神
清含俊逸筆古造精微遐想隨時倦幽棲與世違黃茅
松下屋白石水邊磯芳餌沈新月長綸控落暉結盟鷗
鳥狎墜釣鰕魚肥柳樹煙中坐蘆花雪外歸淮山將翠
遠楚樹送青圍清夢遊仙島丹心拱帝畿江湖香稻飯

泉石綠蘿衣風月詩囊貯塵埃醉袖揮野人供葛屨童
子掃柴扉隨地聲華遠到城踪跡稀晚樽螃蟹熟秋水
鷺鷥飛鴛鴦方宜貴驂騑不可轍逍遙比徐勉恬淡過
王晞始有高人傳終無別壑譏靜觀懸畫軸高卧枕琴
徽歌和滄浪罷先生獨見幾

其二

幽人踈且懶畫裏見真容仙骨秋山瘦龐眉暖翠濃林
巒追馬遠神觀逼劉琮朝市行行倦功名事事慵石磯

苔蘚護野服芟荷縫釣月一竿竹巢雲兩樹松解蓑堆
杜若投餌傍芙蓉柳映青浮影萍開翠露踪緜輕江色
淨魚躍浪痕重渭上熊羆夢人間錦綉胸暢懷灘七里
無意祿千鍾迹似天隨子名高阮嗣宗困依臨岼樹歸
看隔江峰鱸細絲銀鯽羹香煮籜龍話尋樵侶對行與
釣徒逢晴荷衝煙笠寒攜踏雪筇篷窗紅日上石徑白
雲封朝士題詩贈家童釀酒供山僧持鉢過溪友抱琴
從我欲江湖去乘舟訪鮑溶

庚戌歲元日書事錄奉陽城知縣李文輝主簿

方彥清并寄會上諸君子三十韻

王會今朝是陽城展禮初琴堂將綵結天闕用金書飭
壁蛟龍障橫門鳥隼旗堯天雲盡斂化國日初舒階上
發仙仗江東望帝居燭隨卿月朗香度曉星踈嫋嫋鳴
絲管鏘鏘響佩琚威儀嚴禮樂文綵爛璫璵趨步方隨
鷺清班已貫魚儒冠我卓穀朝服曳紅裾斑白三者宿
雍容衆小胥道人衣短窄釋子足趨趨秉笏容端矣升

階色勃如日華融海岳春意動堪輿聖壽聞三祝皇風
待一噓時和方鼓舞天遠更躊躇民頌新年集臣忠舊
日據官情趨殿陛農慶滿郊墟鄉老驚蘇頌村童識李
畬分錢傳若谷享俗得橫渠凍雪侵庭積晴嵐落市虛
靜開省牘幕香動採芹祛臘酒濃浮蟻春盤細薦蔬歌
兒金縷唱舞妓翠鬟梳客自他鄉寄年從昨夜除已燒
驚鬼竹不結送窮車自是驅儻後還成守歲餘裁詩非
鮑謝陪坐愧嚴徐笑裏談庠序樽前憶里廬自憐過六

十何日返鄉閭

秋闈即事次北平憲副吳文明考官韻

皇明重科選奎宿方昭然材薄愧秋闈座重廣文壇才
華萃棘屋冠佩皆時賢主文憲節持風彩照鵷聯清識
澗藻鑑何有劉蕡捐宛追校書向午夜青藜燃得士貢
周庭詩繼卷阿篇

題四十三代天師無為仙人者山庵三十韻

先天涵太始斯道本希夷
坤元機露網緼大化滋至

人觀微妙內境混冲熙仙譜乘靈肩名山表壽耆雲仍
四十禩道德五千辭龍虎蟠丹鼎蛟螭擁翠旗卜居占
勝地環衛宿柔祇員嶠雲中見蓬萊海上移陰崖懸北
斗陽境煥南離翼翼清都近重重翠霧披天光生泰定
淵默契無為雷雨昭靈貺煙霞闕隱思步虛風引佩御
氣月乘輜石室流瓊液玄田長玉芝丹砂訪勾漏瓜棗
致安期畫畚溪山勝壺天日月遲松花春釀酒桐葉夜
題詩卿相門前轍仙人石上棊高風清可挹逸駕邈難

追德澤徵來裔神功翊盛時振振麟在數嘒嘒鳳鳴岐
治世禎祥協安居福履綏寵章頻賁飾靈物久呵撝朝
覲觀周典衣冠仰漢儀班行聯鷺羽光彩動芝眉傾盖
頻相語通家夙所推青冥歸鶴騎紫氣濕龍池佳菊留
霜艷幽蘭擢露蕤尻輪慚莫御羽館聞難知望望明河
隔江梅發舊枝

西隱集卷二

欽定四庫全書

西隱集卷三

明 宋訥 撰

律詩

高平儒牛好古以獨蠶引絲為扇因見贈戲以
詩答之

玉斧親修月一輪清光便與素娥分
丹砂化木為烏玉
春蠶引絲成白雲非素非紈驚老眼
不華不俗漾清芬

午窓推枕涼風發錯認新詩寫練裙

過馬陵關龐涓墓下作

救韓齊將出關門魏國追兵勝負分
滅竈一籌輸豎子伏林萬弩待將軍
書名斫樹無遺迹埋骨依山有舊墳
斷足不知勅敵在謀身踈濶可憐君

次潞州判官王宗大途中書事韻

并州歸路出汾西滿馬黃塵首屢低
漳水淨涵霜練潔太行高插劍鋒齊
新詩起草推敲澁老眼生花眺望迷

不獨山城連榻卧為君今夜更留題

詠菊

百花浮冶易為衰獨有秋芳一種奇
比德幽香歸楚些
宜人高節入陶詩一叢孕秀霜沾蕊
三徑含英露滿枝
丘壑自多知己樂肯同桃李競開時

送朝天宮道士潘師正祭海岳南還

祀禮精誠格上旻寰區海岳盡清芬
聖文勒石來三晉
天使將香下五雲
午夜簫聲青玉管
晴秋仙影紫霞裙

明朝騎鶴蓬萊去細錄成功奏放勳

寄東崖居士霍元方典教兼呈趙樵山元昌

別後相思入夢中東崖崖下一詩翁茅齋晚會烹河鯉
芹水秋書待塞鴻融帳高懸沙麓月陶巾輕折野田風
樵山老友如相問為說歸來樂處同

有懷趙樵山元昌老友乃用前韻以寄之

詩囊書篋出吳中便是東籬采菊翁
華表柱頭相語鶴秣陵江上獨歸鴻
高情有契山頭月雅望無虧鐵面風

想見樵山園圃好遺安妻子鹿門同

吳楚江山共眺中別來多憶宋涪翁書無尺素傳雙鯉
詩有長箋寄一鴻沙蘆短蓑南畝雨樵山高枕北窓風
林泉滋味煙霞癖寔與青雲路不同

趙樵山見和復用韻以答之

半年學稼入田中時訪村西鶴髮翁草徑暖煙晨牧犢
蓬窓秋雨夜聞鴻瓜香果熟園林趣酒濁雞肥里社風
野鳥不知興廢事爭枝擇樹滿林同

故里初歸整頓中草堂欲學浣花翁芳樽酒熟濃浮蟻
老眼詩成遠送鴻晚節半籬黃菊露秋聲一榻碧梧風
于今只有樵山在暮景何妨事事同

元方既次韻見寄又聞辭訓導之職來歸東崖
故居乃再用前韻以賀之

歸來不在別離中後進應懷絳帳翁邑里琴絃陪杖屨
家庭二子列鸞鴻綠楊野渡詩人興翠竹茅亭處士風
何用沈生山水筆東崖真境畫圖同

前盟曾記十年中共向淇東作釣翁
三徑主人今將詡
五噫高士漢梁鴻
陶情寄興樽留月
問柳尋花杖曳風
莫把蒼顏容易失
要將清致古人同

舊隱高崖曲岸中
療飢歸作採芝翁
無人徑造依亭竹
有子書追戲海鴻
門外小船漁笛月
籬東矮屋酒旗風
先生襟韻知何似
似秋菊春蘭臭味同

參苓不貯藥籠中
老作人間自在翁
日昃芹官辭蓮鷺
天高榆塞羨歸鴻
芒鞋翠濕巢松露
布袖香沾采藻風

村飲野吟農圃樂與君從此四般同

聞元方辭典教之職為省府所留遂用前韻以
慰其懷歸之念安其傳道解惑之心也

濟濟羣材樂育中先生何待蜀文翁銅臺聲聞鳴臯鶴
泮水去留遵渚鴻照座青藜聽夜雨遠壇紅杏詠春風
化行俗美師儒力者與蘇湖兩郡同

盛名久列廣文中人比先生節孝翁種竹昔留亭上鳳
採芹今對水邊鴻升堂化沛諸生雨為國文興一代風

他日銅臺推教養不知來者幾人同

元方次韻見答復用韻酬之

先生家在畫圖中脩竹幽亭一醉翁
舍後佺山翔白鶴門前淇水落蒼鴻
散人名號龜蒙趣高士衣冠孺子風
更有東崖出塵表雲朝煙暮太行同

歸來即事再用前韻寄霍東崖元方

田園兵後草萊中未要忘機論海翁
茅屋四鄰羅鳥雀蕪詞一紙托鱗鴻
蠶桑雞黍家家事燕麥鳧葵處處風

何日相期歸舊隱水邊林下著參同

繁華市井冷灰中去亂兒歸半是翁一塔有巢留垤鶴
兩潭無水著沙鴻興如張翰思吳俗心似鍾儀樂楚風
故國遺民說華表人非城是古今同

行止常驚坎窞中衰年欲作嘯嚆翁才華不是鳴陽鳳
踪跡渾如踏雪鴻黃犢隴頭蓑笠雨白駒場上几筵風
祇知此意堪娛老未信先生不我同

幾年陵谷變遷中壯歲回頭已禿翁狂客彩箋猶吐鳳

佳人錦瑟罷移鴻衣冠復古多新製尊俎論文有舊風
極目干戈無事日車書重見萬方同

頭顱羞到鏡心中得失何須問塞翁隱變潛斑知霧豹
去寒就暖見雲鴻夢回先壠松楸雪腸斷空城草木風
欵帽短衫林樹下不妨言笑里夫同

題陽城方判簿禱雨詩卷

恒風吹沴薄山林原隰陽驕暑未沈三日雨符憂旱禱
一誠天應愛民心西山久沐仇香澤南畝重沾傳說霖

欲識賢侯多善政陽城來聽有年吟

壬子歲考試秋闈次受卷官北平行省照磨葉

叔則中秋詩韻

兩界山河月色分西風掃盡九天雲桂花玉宇稀星緯
蟾影銀河捲練紋詩為清秋宜有句酒當今夕莫辭醺
俊髦步武薇垣上何憶故園江水濱

樽壘清興與誰分月下冠裳氣薄雲秋景夜銷銀燭燼
露華涼皺葛衣紋文衡自省精研定酒聖人推劇飲醺

今日車書歸一統通州河下即江漬

秋闈再和葉叔則照磨中秋詩韻

老眼重將玉石分棘闈還有賦凌雲天教桂月移輪影
風約香煙裊篆紋勝會何妨華燭照清衿不受濁醪醺
九重宵旰求賢切風化流行豈汝漬

壬子秋過故宮十九首

離宮別館樹森森秋色荒寒上苑深北塞君臣方駐足
中華將帥已離心興隆有管鸞笙歇劈正無官玉斧沈

落日凭高望燕薊黃金臺上棘如林

其二

技巧聲淫悞帝聰萬幾誰為代天工國中失鹿迷原草
城上啼烏落井桐駝鼓聲乾鸞輅遠馬桐筵罷革囊空
不知金宋為殷鑒漫說東皇歷數終

其三

禁路隨人不忍行臨風立馬倍傷情千年王室山河壯
萬里官車社稷輕金鼎夔龍興聖殿紫駝部落受降城

憑誰為問天魔女唱得陳宮玉樹聲

其四

萬國朝宗拜紫宸于今誰望屬車塵名聞少室徵奇士
驛斷高懸進美人朝會寶燈沈轉漏授時玉歷罷頒春
街頭野服儒冠老曾是花磚視草臣

其五

六宮春色一宵殘夷難何人策治安去國登瀛唐學士
降城執戟漢材官瑤宮有扇捐金雀紫塞無旗捲角端

花柳亦知宮女散粧紅顰翠簇金鑾

其六

土木窮奢過楚臺披香積翠滿蓬萊官鴉驚月鷄人去
戎馬騰雲虎士來侍從嚴徐冠蓋散燮調楊李棟梁摧
燕歌趙舞終朝夕不覺嬉遊是禍胎

其七

扶運匡時計已差青山重疊故京遮九華宮殿燕王府
百辟門庭戍卒家文武衣冠更制度綺羅巷陌失繁華

輶車盡載天魔去惟有鶯銜御苑花

其八

黃葉西風海子橋橋頭行客弔前朝
鳳凰城改佳遊歇
龍虎臺荒王氣消十六天魔金屋貯
八千霜塞玉鞭搖
不知亡國盧溝水依舊東風接海潮

其九

鬱葱佳氣散無踪
官外行人認九重
一曲歌殘羽衣舞
五更粧罷景陽鐘
雲間有闕摧雙鳳
天外無車駕六龍

欲訪當時泛舟處滿池風雨脫芙蓉

其十

五雲雙闕俯人間歲晏天王狩未還鸚鵡認人官漏斷
水沉銷篆御床閒朝儀無復風雲會郊祀空遺日月顏
莫向邊陲動戎馬漢兵已過鐵門關

一作漢家今
已塞三關

其十一

灤京南下是中華夜出居庸去路差何處又栖王謝燕
故侯誰種邵平瓜九重門闢人騎馬萬歲山空樹集鴉

獨有天池秋水滿西風吹入釣魚槎

其十二

仙裳官袖擁龍舟一夕兵來罷盛遊萬戶千門銀燭冷
六軍百職布袍秋御橋路壞盤龍石金水河成飲馬溝
日暮胡笳和羌笛舞兒羞見錦纏頭

其十三

萬年海岳作金湯一望淒然感恨長禾黍秋風周洛邑
山河殘照漢咸陽上林春去官花落金水霜來御柳黃

虎衛龍墀人不見
戍兵騎馬出蕭牆

其十四

漢皇愛舞起龍船
錦纜香維御柳煙
侍女爭開粧鏡匣
後宮不理敗弓絃
青油幕乏登壇將
金馬門空待詔賢
惟有廣寒西畔柏
不知爭戰翠參天

其十五

清寧宮殿閉殘花
塵世回頭換物華
寶鼎百年歸漢室
錦帆千古似隋家
後宮鸞鏡投江渚
北狩龍旗沒塞沙

想見扶蘇城上月照人清淚落胡笳

其十六

瑤臺瓊室倚清虛佳氣潛消諫疏踈帥聞有兵空虎衛
經筵無講遂鑿輿侯封一代皇孫爵帝紀千年太史書
斜日五雲坊下路老儒騎馬重躊躇

其十七

黼座簪裳列俊髦禁闈環珮立仙曹兩京臺閣工翰巧
四海塗泥赤子勞端本有書遺鶴禁宣文無客進龍韜

拂郎天馬空踰海不駕朝元玉輅高

其十八

事事傷心亂若絲宮前重詠黍離詩百年禮樂華夷主
一旦干戈喪亂師鳳詔用非麟閣老雉門降是羽林兒
行人莫上城樓望惟有山河似舊時

其十九

雲霄宮闕錦山川不在穹廬毳帳前螢燭夜遊隋苑圃
羊車春醉晉嬋娟翠華去國三千里玉璽傳家四十年

今日消沈何處問，居庸關外草連天。

客北平聞行人之語感而成詩四首

虎將朱旗直指燕，燕山王氣便蕭然。
輕如晉武平吳日，遠似唐皇幸蜀年。
朝市夜沈三輔月，禁闈寒斷六宮煙。
延春閣上秋風早，散作哀音泣播遷。

其二

將士城門解甲初，不知相府已收圖。
霓裳宮女吳船載，繡服朝臣漢驛趨。
甲第松筠幾家在，名園花草一時無。

行人千步廊前過猶指官墻說大都

其三

相臣無策奏巖廊傾國傾城總禍殃同輦誰辭婕妤詔
後庭多學麗華粧出墻御柳先零雨入塞官花半謝霜
畢竟玉顏成底事空遺殘粉汙椒房

其四

幾迴人起亂中華僭賞輕頒將相麻示儉巖宸空植草
助嬌上苑浪移花當年翠輦三山路此日羶車萬里沙

自古國亡緣女禍天魔直舞到天涯

舟中九日

較藝秋闈笑久留潞河九月買歸舟誰將綠酒慰青眼
自愛黃花插白頭野飯清香烹海螯客帆高興付沙鷗
興亡有感無人問滿地黃蘆認霍州

舟宿桃花口

桃花口上有人家落日孤帆繫水涯客子茶瓶浮螯眼
漁翁茅屋傍蘆花半船涼月潮生海兩岸秋風浪拍沙

一夜故園歸夢好
笑着松菊坐煙霞

舟過楊柳青

楊柳青枯異昔年
人家猶有住河邊
縛蘆厚覆低低屋
把竹輕撐小小船
半列霜禾喧鳥雀
輕燒煙樹立鷓鴣
眼前莫究興亡事
萬里輿圖自一天

直沽舟中

旅思搖搖嗜晝眠
舟人報是直沽前
夕陽野飯烹魚釜
秋水蒲帆賣蟹船
詩有白鷗沙上興
書無青鳥海東傳

老為聲利閒驅遣少讀南華四五篇

直沽夜泊

海舶河帆到此分直沽名舊遠方聞十年水路兵塵隔
兩岬人家野火焚鷗鷺沙邊船泊月魚蝦鄉裏飯抄雲
却思昔日曾經過紅酒青歌醉落曛

舟中書事

秋晚懷歸去路遐菰蒲斷處見漁家野航招客買蓮子
沙鳥驚人入荻花水島風帆懸落日天空霜雁逐飛霞

主文不是河源使莫說張騫萬里槎

舟過長蘆

列肆亭臺感不勝
舊時和氣冷如冰
城池人物分今昔
市井繁華間廢興
斷壁野花迎客棹
壞橋津柳曠漁罾
誰知兵後商人少
歲課猶隨國用增

鹽螿數枚寄段攝中誼齋

無腸公子舊知名
風味非糟亦自清
祇信海霜肥郭索
須勞野火照橫行
兩螿白雪堆盤重
一殼黃金上箸輕

公退辟寒應買酒獻芹毋笑野人誠

誼齋段判簿見訪以詩謝之

衰年行止負虛名百里文軒載酒清黃葉柴門仙客到

白雲茅屋野人迎

一作童子
掃野人驚

維槐齋馬花鬃潔栖棟祥

鸞彩羽輕自恨陳遵不投轄荒村斜月促歸程

洪武癸丑九月十八日為外兄集賢大學士張

東谷賀八十五首

甲午重經癸丑年人間八十地行仙名齋綠野堂中相

望重香山畫裏賢
卿士月華臨故國
老人星彩麗中天
九齡已立開元業
有酒何妨醉壽筵

其二

致政官高舊集賢
治平功業至今傳
衣冠洛下耆英會
福祿人間甲午年
憂世丹心生白髮
過庭綵服映青氈
年年重九重逢九
來會瑤池祝壽仙

其三

天為邦家產俊賢
鳳池烏府寵榮全
累朝事業應傳後

當代軒裳不愧前節去重陽多九日壽高潞國過三年
從今種秫為春酒醉看畊耘二頃田

其四

淇水門前綠遶煙投閒野服勝林泉天生上相重陽後
人頌高年五福先三輔聲華京兆尹六曹才望太平賢
香山九老誰相似刑部尚書白樂天

其五

莫說光陰入暮年歲寒松柏操同堅丹楓陛下三朝老

黃菊籬邊九月仙故國鱸魚張翰繪高門冠蓋李膺船
一時朝士知誰在獨有先生晚節全

金陵懷古

六代興亡不用哀登臨勝有鳳凰臺江山形勢寒潮去
人物升沈夕照來白鷺洲邊沙鴈叫烏衣巷口野花開
翠微亭外秦淮柳為問青青幾度栽

寄東崖霍處士

臨風鍊句寄東崖近別情懷不用猜問病未能持藥去

添丁先喜弄璋來
窗前怪石三峰倚
盆內新荷兩朶開
何日幽期可踐約
買魚同立岸邊苔

寄趙樵山元昌

名重詩壇趙倚樓
金陵別後憶賡酬
槐安夢斷樵山曉
彭澤辭成菊徑秋
昔聽高岡鳴瑞鳳
近知別浦狎盟鷗
文成魏志期相會
不作山陰訪戴舟

挽霍元方處士七首

蒼天何意墜斯文
來向淇東哭隱君
麗澤友朋誰講習

鹿門妻子自畊耘
夢中彩筆投寒月
屋外青山慘白雲
白髮舊交重悵望
荒原衰草記新墳

其二

玉芝一夕悴奇芬
悲動儒林遠近聞
委畚老妻收舊褐
過庭嗣子集遺文
東崖花木詩無句
北海樽罍酒不醺
楚些招魂歌未徹
渡頭驚起白鷗羣

其三

伍山英氣降鴻儒
一病光陰隙過駒
醫俗主人辭勁竹

弔亡高士致生芻牙籤架上遺經史寶墨床頭卷畫圖
莫怪挽詩多慘切白楊風雨夜臺孤

其四

細數交游四十春期君壽域作天民白雲不護窗前石
黃壤先埋席上珍五尺丹旌書處士一編藻句記詩人
傷心未及靈輶送重對青山淚濕巾

其五

詩酒方將樂莫年誰知含笑掩重泉異端感世遺言拒

正道忘身愛子傳
砌下翠乾新
剝竹池中香
斷舊栽蓮
平生清致無由覲
漫看東崖起斷烟

其六

浮生六十四年春
酒聖詩豪到處聞
千里騰驤空冀北
一家清白傍淇濱
簞瓢卷有高軒客
詩禮門無雜弔賓
想見九原清節在
再歌哀挽薦溪蘋

其七

弱冠登臨賦遠遊
壯年談笑揖公侯
水邊花竹黃茅舍

天上文章白玉樓三載書帷留董子一朝布被蓋黔婁
嗟君去後淇河上更為誰乘雪夜舟

濬縣知縣項如英築野遣人遠餽酒榖仍寄詩
相問隨用韻以答其盛意為後日之會一笑

天台高士項斯賢詔牧黎陽治化宣事業遠符殷傳說
文章曾賦漢甘泉雙罌酒美勞人送一紙詩新染翰傳
自愧非韓亦非孟不知君許作忘年

其二

天妹精英產一賢來從築野事承宣臣心東注朝宗水
士節清懸瀑布泉桃李河陽潘岳種弦歌魯邑子游傳
政隨春雨東臯足佇聽歌謠大有年

其三

治平天子久招賢卓魯循良陋董宣奕世英姿溫若玉
揮毫吟思湧如泉琴堂政暇留賓話泮水功成勒石傳
祥鳳景星爭快覩識君從記甲寅年

其四

暮境無能愧昔賢詩葩詞藻強敷宣不隨隱士巢丘壑
且伴樵人樂石泉酒向落花茵上飲道從汗竹簡中傳
山城後日尋君處殘恨光陰已隔年

再過故人霍元方故居因作詩以寄嗣子怡伯

怡仲

重過東崖處士居門前猶有故人車九原風雨三生夢
一壑烟霞萬卷書華表何年重見鶴淇濱今日獨觀魚
知君不減遨遊興萬里騎鯨入太虛

其二

欲登醫俗舊茅亭
主去亭空德自馨
載酒無人重問字
聞詩有子自趨庭
程門誰立諸生雪
淇水先沈處士星
縹緲吟魂何處在
竹梢空見歲寒青

乾

鐘

澗

鐘

山

鐘

西隱集卷三